

# Schnitzelpunk

Ausschnitte aus dem Programm 2014

Kürzlich in dr Sauna händ miar üs überlait  
Wias wär wänn zmol dr Stapi do ind Sauna inaschnait  
Susch überall derbii, würd ihm das schnäll vertlaida  
Ir Sauna wird nit gfötalat und kasch di nit verklaida

D Chinesa kontrollierend d U S A mit starker Hand  
D Russa d Ukraine und dia Tütscha Griachaland  
Wia mänga stolza Staat wird au Chur manipuliert  
Miar wärdend scho sit Johra vo Namibia us regiart

Bisch du z dick, gits jetz a neuu Kur  
Nimmsch a Hund und gosch mim Zirkus Knie uf Tour  
Aber muasch ufpassa, verlürsch dänn nid nu Späck  
Wenns dumm goht sind uf zmol au dini Pointa wägg

D Energiedebatta, dia söll dr Tüfel hola  
Ob Sunna-, Wind- ob Wasserkraft sgoht immer nur umd Kohla  
Miar bruchend jetz ganz gschwind a gratis Strom-Maschina  
Guat wär villicht im Grossa Rot a Warmi-Luft-Turbina

Irontrail, Tortour und Gigathlon  
Masochismus isch modärn, hüt lauft ma Marathon  
Sött jeda sälber wüssa, glich müamer protestiara  
Üs pissts halt a, wänn d Wiiber gönd god Schöppe wägg trainiara

D Spitöler sind scho voll, sie kömmend, sisch kai Witz  
In Massa und zu Mindestlöhn vom Norda här ind Schwiz  
Dia Schwoba-Dökter gönd jo no, doch das müand miar nid ha:  
Jetzt holends no vo Basel sonna Dokter FMH

Fürd Hostia muasch bim Huonder a raini Westa ha  
Kai Homoglüscht, kai Schaidig und kai Goofa ohni Maa  
A ganz a schlaua Fuchs, das rächnet sich dänn schnäll  
Gizig mitta Guatzli kompensiert är d Stüürusfäll

Dr Stucki küsst dr Sempach mit Sagmähl uf am Rugga  
Und sait zu sim Bezwinger: „Kum hära, lass di trugga  
Du bisch jetz Schwingerkönig, ab hüt häsch nüt meh z Spassa  
Muasch jedem Tubel d Kella schüttla und mim Blocher jassa“

Landfrauakuchi: nid schön drfür könnds kocha  
Dr Bachelor mit sina Mäus, a sona doofa Knocha  
Machend doch an Mix us däna zwai Format  
Nänd gaili Brüt an Herd und statt dr Vujo Aromat

Dr Jürg Jenatsch händs letscht Johr exhumiart  
Ma hät viel ussagfunda, doch no niamert informiart  
Dr Huonder dä weiss meh und lütet a uf Rom  
Sait: „Franz muasch ko go luaga, s lit a Tunta in mim Dom“

Är isch dr Superheld uf am Polit-Parkett  
Als Diplomat, trotz SVP, sogar zu Russa nett  
Macht ds Schualraisli mim Panzer, a sona kaiba Spuali  
Das wär doch öppis fürna Film: Achtung fährtig Ueli

Dr Russakönig Putin isch sona gaila Siach  
Dä zaigti, wens grad si müasst, am Herrgott wiamas miach  
Zum högschti Ziel erreicha, brucht är schwarzi Magie  
Und bricht mit Voodoozauber am Colonia sina Schgii

Dassz St. Moritz d Chinesa lärend Schgina  
Händs neuerdings, das isch kai Witz, Schilehrer gholt vo China  
Masshaft Chinesa könnt üs dänn scho no stressa  
Zmol müand miar d Gärstasuppa und Maluns mit Stäbli ässa

Als Raubtiar läbsch nid lang, wenn du zviel Hunger häsch  
Kasch nid aifach näh wasd wetsch, susch gits Tätsch  
So aina hämmer usgschafft, är kann zwor gar nid bälla  
Nu hamstara ohni Schaffa, dä Krüppelhund Vassella

Miar würdend niamols säga, Italiener segend fuul  
Au wärdend miar nia bhaupta, Kardinäl dia segend schwul  
Miar sägend nid, d Franzosa segend immer untreu gsii  
Oder tütschi Promis segend gwagglig uf da Schgii

Vom Tagblatt ds neua Layout, vo Experta scho prämiart  
Spart Papier dank kliiner Schrift, das hät üs imponiert  
Doch wens dänn würlkli bruchsch, häts glich an Wermuatsropfa  
Muasch a Wucha sammla, bisd kasch nassi Stifla stopfa

Dr Wolf isch tot, C S I Grischun schafft flott  
Im Unterland verhängends glich, an Bündnerland-Boykott  
Miar könd Sie jetz beruhiga, ds Projektil bringt ds Resultat  
S kunnt ussem Sturmgewehr vomna Zürcher WK-Soldat

Mit da guata Pointa isch das sona Sach  
Und mängmol sind au üssri Värslis ehnder fad und flach  
Miar schribend dia nid sälber, miar köntend das nid rächt  
Sie sind vom Zuccolini und für das doch gwüss nid schlächt

Ma hät üs letscht Johr gsait, dass dä Punksound nid ushaltsch  
Üsra Schlussakkord dä segi schlicht und aifach faltsch  
Doch dasch genau dr Gag, möglichst schrill und möglichst schräg  
Dasch Kunst und wenn das d Lüt verstönd, gits nia Kulturbiitrag